

全詩紀事卷八

金詩紀事卷八

侯官陳衍輯

劉從益

從益字雲卿渾源人大安元年進士拜監察御史貶爲葉縣令有善政又入授應奉翰林文字有蓬門集

渾源州志劉摛至其曾孫登進士者若汲若仲澤若侃若儼若從益從禹共八人嘗求書八桂堂於趙閒閒曰君家豈止八桂爲書叢桂窟歸之

歸潛志凡作詩和韻爲難古人贈答皆以不拘韻字迨宋蘇黃凡唱和須用元韻往返數回以出奇余先子頗留意故每與人唱和韻益狹語益工人多稱之嘗與雷希顏元裕之論

詩元云和韻非古要爲勉強先子云如能以彼韻就我意何如亦一奇也嘗在試院與屏山諸公唱和呂唐卿海藏齋詩舟字韻往返十餘首先子有云繡幄舊圖翻短褐朱書小字記歸舟屏山大稱其工用事也後居淮陽與劉少宣唱和村字韻亦往返數十首少宣以爲全不覺用他人韻也

又聯句亦詩中難事李屏山王正之聯句王云棘猴未窮巧穴蟻已失王人多稱之余先子留意聯句主長葛簿時與屏山張仲傑會飲坐中有定磁瓶因爲聯句先子首唱曰定州花磁瓶顏色天下白諸公稱之屏山則曰輕浮妾玻璃頑鈍奴琥珀張則曰氣質至堅脆膚理還悅澤後居淮陽冀京父來過雪夜聯句先子有云簾疎見飛英窗靜聞落屑又李欽

叔來過李子遷在座會合聯句先子有首唱曰玉立兩謫仙
鼎峙三敵國又云三強出奇兵八柱乃八克一老怯大敵三
戰卽三北後自大梁歸陳與友聯句先子首云紅拋汴梁塵
綠吸淮陽酒後令葉縣中秋夜與郝訪舟仲純王飛伯輩聯
句具載蓬門集中

送兒子赴試

老作一兵吾命也方聯七桂汝身之厚祿故人如見問爲言塵土困
王尼

歸潛志金朝兵制最弊每有征伐或邊釁動下令僉軍其民
家有數丁男好身手盡揀取無遺元光末備潼關黃河自見
居官外無文武小大職事皆揀之前戶部郎中侍御史劉元

規年幾六十亦中選爲千戶余先子以前監察御史亦爲千戶既立部曲須依軍例以次相鈐束時余以終場舉人獲免余赴試開封先子以詩送之且寄趙閒閒雷希顏有云云二公覽之一笑

戲答侯威卿覓墨

萬松火厄化緇塵依舊徂徠雪裏春
令劑香螺夔一足破慳分與畫眉人

句

有晉必無楚兩雄難並驅向來旣發藥其可止半途
君年逼桑榆隻身憂患餘雙親白楊拱同氣紫荊枯
貧無孟光春醉無驥子扶惟有忠義名可與天壤俱
寄語多言唐諫議生還記取李師中

歸潛志許司諫古少擢第南渡爲侍御史時丞相尤虎高琪
擅權變亂祖宗法度公上章劾之上知其忠常庇翼之凡有
奏下尙書省輒去其姓名然竟爲高琪所中貶鳳翔幕正大
初召爲補闕遷左司諫言事稍不及昔時初貶鳳翔朝士畏
高琪故皆不敢與言余先子時爲提舉南京權貸事獨以詩
送之有云云蓋欲堅其初志也聞者竦然多傳之後爲鳳翔
錄事先人又寄以詩云云亦此意也

句

黃金錯落雲閒闕紅粉高低柳外牆 荒煙斜日村村晚衰柳寒蒲
岸岸秋 兩鄉留寓風薰面千里相望月滿樓子美不妨衣露肘長
卿猶有賦凌雲 千層寶樓閣一片玉山川

春雪

壞壁秋燈挑夢破老

梧寒雨滴愁生

臨終

中州集雷御史說雲卿在太學時年甚少嘗有詩云云時輩
皆推服之其卒以詩得名者固已見於此矣如各云云春雪
云云臨終云云此類甚多不能悉數也二子祁字京叔郁字
文季俱有名於時

郝天挺

天挺字晉卿陵川人早衰多病不復就舉

遣山集先人就陵川令之選時鄉先生郝君方聚子弟秀民
教授縣庠某從之學

題宣聖廟

金碧煌煌梵刹雄玄元樓觀五雲中如何萬代綱常祖釋奠今無數

畝宮

青鞋踏雪志汾州學宮門右有石嵌壁中乃金郝天挺募建
文廟疏其文伏以下書絕句一首卽接謹疏字

移刺霖

霖字仲澤官至武定軍節度使兼奉聖州管內觀察使

驪山有感二首

蒼苔逕滑明珠殿落葉林荒羯鼓樓渭水都來細如綫若爲流得許
多愁

山下驚飛烈火灰山頭猶弄紫金杯夢迴未奏梨園曲臥聽吟風阿
濫堆

石刻拓本移刺相公驪山有感詩跋詩之興也久矣其源本

出於國風之什濫觴於漢魏派演於六朝下逮唐宋汪洋大
肆靡所不至大率以鍊格鍊意鍊句鍊字爲法而少能相兼
自各名家而已必求其粹然可稱道者亦不多得焉嗚呼詩
道之難也如此按察相公人品高秀天性奇穎始以儒業自
舉一游場屋芥拾甲科已而事與願違投筆就宦然遊戲翰
墨之間初未廢其寸陰大篇短什率皆出前人用心不到處
士子仰之如泰山北斗向提憲關中嘗有題華清宮三絕句
遠近傳誦不啻膾炙方以不多見爲恨頃因再游復留一絕
格愈老意愈新句愈健字愈工恬然備四鍊體自非深於文
章者其孰能與於此友人賀吉甫已作傳遠計迺命遼東孫
吉之書諸石九嶼徐從周刻其字晉陽舊部吏聞而喜之復

識歲月於後云承安屠維協洽書雲後七日謹跋

劉昂霄

昂霄字景元別字季房陵川人

中秋日同辛敬之魏邦彥馬伯善麻信之元裕之燕集三鄉光武廟諸君有詩昂霄亦繼作

積甲原頭在閼宮登臨還喜故人同迢迢萬里乾坤眼凜凜千年草木風歲月消磨詩句裏河山浮動酒杯中極知勝日須轟醉直待銀盤上海東

歸潛志博學能文從屏山游又與雷希顏辛敬之元裕之善隱居洛西山水之間其詩有云云元裕之嘗稱之

同敬之裕之遊水谷分韻賦詩得荷風送香氣五字

各賦一首

迂辛與臞元得句猶有味頽垣歛暝色深竹貯秋氣

自註暝色敬之句秋氣裕之句也

句

帶雲縈遠澗和月到疎林 萬里馮唐老中年賈傅歸

中州集嘗用門資敍調慶陽軍器庫使不就諸公方薦試宏
辭而景元病不起矣臨終夢山泉云云又云云未幾下世年
三十七

辛愿

愿字敬之福昌人居縣西南女儿山下自號女儿野人又號

溪南詩老

中州集博極羣書於三傳爲尤精至於內典亦稱該洽杜詩

韓筆未常一日去其手作文有綱目不亂詩律深嚴而有自得之趣性野逸不脩威儀貴人延客敬之麻衣草履足脛赤露坦然於其間劇談豪飲旁若無人高獻臣爲河南治中聞其名引爲上客及獻臣爲府尹所誣敬之亦被訊掠幾被一網之禍自是人以敬之之名爲諱絕不與友不二三年日事大狼狽田五六十畝歲入不足一牛屢爲追胥所奪竟賣之以爲食衆雛嗷嗷張口待哺雅負高氣不能從俗俯仰迫以饑凍又不得不與世接其枯槁憔悴流離頓踣往往見之於詩元光初予與李欽叔在孟津敬之自女儿來爲之留數日其行也欽叔爲設饌備極豐腆敬之放箸而歎曰平生飽食有數每見吾二弟必得美食明日道路中又當與老饑相抗

去矣會有一日辛老子僵臥柳泉韓城之間以天地爲棺槨
日月爲含穢狐狸亦可螻蟻亦可耳予二人爲之惻然敬之
佳句極多如自憐心似魯連子人道面如裴晉公萬事直須
稱好好百年端欲副休休院靜寬留月窗虛細度雲浪翻魚
出浦花動鳥移枝之類恨不能悉記耳本樓云吟窗醉几秋
風晚只許幽人箇裏知三鄉光武廟云方山青遶一川斜到
其處知爲工也

句

院靜寬留月窗虛細度雲 鶯銜晚色啼深樹燕掠春陰入短牆
波搖朗月浮金鏡嶺隔華星斷玉繩 箕山潁水春風裏喚起巢由
共一杯 黃綺暫來爲漢友巢由終不是唐臣

歸潛志正大中先子令葉復來游後歸洛下病歿有詩數千
首常在竹橐中其佳句有云云又云云又云云又云云又云
云真處士詩也

王鬱

鬱字飛伯大興府人自作王子小傳先生名青雄一名爵
中州集少日作樂府擬古別離有黃鶴樓高雲不飛鸚鵡洲
寒星已曙之句人多傳之其後入京師大爲李欽叔所稱與
之詩云詩句嫵國風下者猶楚辭贈詩者甚多有云憶昔潁
亭見飛伯恍若夢中逢李白又云紫陁仙人今淵雲騎風御
氣七尺身又云良金元有價白璧況無瑕又云王郎少年詩
境新氣象慘澹含古春筆頭仙語復鬼語只有溫李無他人

飛伯用是頗自貴重云

歸潛志王飛伯奇士也爲文法柳柳州歌詩飄逸有太白氣象爲李翰林欽叔麻徵君知幾嘉賞且共爲延譽已而入南京見趙雷諸君皆稱之不已丙申南遊爲東諸侯兵士所得其將厚遇之爲其下所忌見殺其詩文往來與余最多有淮陽唱和南頓聯句古賦銘贊書序數十首

畿輔古蹟志釣魚臺在阜城門南十里花園村古花園後爲村今平疇矣金王鬱釣魚臺有泉湧地出爲玉淵池今人呼鬱臺更呼釣臺焉且合而呼之曰釣魚臺

飲密國公諸子家

宣平坊裏榆林巷便是臨淄公子家寂寞畫堂豪貴少時容詞客聽

琵琶

歸潛志密國公璫自號樗軒居士造其第一室蕭然琴書滿案一時文士如雷希顏元裕之李長源王飛伯皆遊其門飛伯嘗有詩云云蓋實錄也

冀禹錫

禹錫字京父龍山人崇慶二年進士官尙書省都事蒲察官奴之變見殺

句

忠策萬言憂國獻好詩千首課兒鈔 大才自古無高位吾道何人主後盟 醉鄉廣大寬留地仕路崎嶇小作程

歸潛志少年作詩鍛鍊甚工其贈先子云云又哭先子云云

又云云嘗作余先子哀詞雷丈希顏善之

雷淵

淵字希顏別字季默渾源人崇慶三年進士甲科釋褐官至翰林院修撰

歸潛志喪父以孤童入太學讀書晝夜不休從李屏山遊遂知名

紫芝峪

仙徑玄雲覆靈芝紫氣浮朝霞屯錦蓋春雨潤珠旒蘭有香偏襲苔無色可侔如何采真客辟穀費冥搜

恆岳志紫芝峪在望仙嶺東北常產紫芝故名金雷淵有詩云云